

ARLeF pe prime volte al festival itinerant “dialoghi”!

Ai 20 di Jugn si presentară “La storie di Lolo il...”; apontament ancje ai 2 di Lui cul incuintri “Gurize: une storie, tantis lenghis”

Pe prime volte ARLeF e rive a “dialoghi”, un festival dal gjornalism e de cognossince cun apontaments in plui localitâts, che intal 2021 al rive ae sô VI edizion. Fra i patrocinadôrs dal event, la Agenzie Regionâl pe Lenghe Furlane e proponarà al public doi apontaments: la presentazion di un volum e un incuintri sul plurilinguism. «*Al è cun tant entusiasim che chest an ancje la ARLeF si pronte par partecipâ a "dialoghi"* – al à marcât il president, Eros Cisilino -. *Un festival che, za tal so non, al comuniche l'obietîf di contribuî a disvilupâ une cussience coletive, in graciis dal confront. Par chest i apontaments che la Agenzie e proponarà a son dal dut in linie cui intindiments de manifestazion. Cun di fat, i events a saran la ocasion par discuti di pluralism ma ancje par ricuardâ il plasê de scuierte e la impuartance dal rispiet des diferencis, che nus fasin preseâ lis personis inte lôr unicitât*».

La prime date di segnâ e je che dai **20 di Jugn, a Insic, aes 17. In chê ocasion si presentară “La storie di Lolo il...”**, un classic de letulture israeliane pai fruts che al conte di amicizie, fiducie e rispiet, cuntune trame semplice ma siore di impreviscj che i doi zovins protagoniscj a frontin cun fuarce e convinzion. Un volum **editât di Forum**, simpri cul jutori de Agenzie Regionâl pe Lenghe Furlane, che al à une particolaritât uniche: al è stât **voltât dal originâl ebraic al furlan e no esist une version taliane**, un fat dal dut gnûf. La opare di Dvora Omer, une des plui impuartantis scritoris israelianis, e je stade voltade di Davide Turello, linguist e filolic de Universitât di Bamberg (Baviere), invezit i dissens che a dan vite ai personaçs a son di Pia Valentinis, vincidore de 21^e edizion dal premi Andersen talian tant che miôr ilustradore. A presentâ il libri al sarà il diretôr de ARLeF, William Cisilino, e cun lui il critic leterari Mario Turello adun cun Gabriele Zanello, docent di letulture furlane de Universitât dal Friûl. “La storie di Lolo il...” al è un volum che, cundut che al sedi destinât ai fruts, al rivarà a incuriosî i grancj. Ancje i gjenitôrs a podaran imparâ, adun cui lôr fruts, cetantis peraulis de lenghe furlane pôc cognossudis e marcadis intal test in colôr naranç. In sumis, dut un mont di scuvierzi!

Ai 2 di Lui aes 10, invezit, tal Istitût Nostra Signora di Gurize, al è in program il secont apontament targât ARLeF, intitulât **“Gurize: une storie, tantis lenghis. Pluralism linguistic e culturâl di une impuartante crosere de Europe”**, che al è indreçât ai students.

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / **e-mail: arlef@caltpr.it**

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<

A contâ trop impuartante che e je la pluralitât linguistiche dal teritori regionâl al sarà Michele Calligaris, operadôr dal Sportel Regionâl pe Lenghe Furlane de ARLeF, che al è ancje insegnant intai cors pratics di lenghe furlane de Societât Filologjiche Furlane e atîf di agns intal setôr de tutele des minorancis linguistichis storichis dal Friûl. L'obietîf al sarà pontât in particolâr sul Gurizan, une aree di grant interès sedi storic che linguistic pal passât dal Continent, ma che, magari cussì no, e salte fûr masse tart intai libris di test plui comuns.

Udin, ai 14 di Jugn dal 2021

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / **e-mail: arlef@caltpr.it**

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<